

Utama perbelanjaan keperluan berbanding kehendak

**Dahlan Ismail
Abu Bakar,**

Timbalan Pengarah
Pusat Kokurikulum dan
Pembangunan Pelajar,
Universiti Putra Malaysia

Dunia kini berhadapan ketidaktentuan geopolitik meruncing. Konflik di Asia Barat yang bahangnya tidak pernah surut bukan sekadar percuturan kuasa negara besar di pentas antarabangsa, malah impaknya mula mencengkam ekonomi domestik dan mengancam kesejahteraan

rakyat.

Berikutan ketidakstabilan itu, negara kini berhadapan tekanan fiskal luar biasa apabila dilaporkan nilai subsidi minyak negara dijangka melonjak drastik daripada RM700 juta kepada anggaran RM3 bilion.

Lonjakan subsidi ini memungkinkan kenaikan rangkaian harga barang tidak dapat dielakkan lagi. Kenaikan ini adalah tindak balas lonjakan kos logistik dan pengeluaran, kesan daripada kenaikan harga bahan api dunia.

Dalam kitaran ekonomi mencabar ini, golongan rentan menjadi kelompok paling terkesan. Tanpa persediaan mental dan strategi domestik ampuh, jurang kemampuan sara hidup pasti akan melebar.

Mendepani ujian ini, masyarakat tiada pilihan selain perlu berlapang dada mendepani realiti pahit ini dengan langkah proaktif, bersifat strategik dan bijaksana. Beberapa cadangan boleh dipertimbangkan, antaranya:

- Pertama, masyarakat mengambil langkah penjimatan total dengan memilih antara perbelanjaan 'keperluan' dan 'kehendak'.

Contohnya, tidak menambah komitmen kewangan baharu seperti membeli kenderaan baharu, membuat pinjaman kewangan peribadi atau berbelanja secara mewah dan berlebihan.


Maknanya, setiap ringgit dibelanjakan hari ini harus mempunyai nilai tambah kepada kelangsungan hidup, bukan sekadar memenuhi tuntutan gaya hidup sementara.

- Kedua, masyarakat disaran membudayakan tabiat menabung dan menyimpan wang untuk objektif lebih strategik.

Bermakna, rakyat perlu agihkan sebahagian pendapatan untuk disimpan. Contohnya, simpanan sedia ada mesti diberi keutamaan untuk

Masyarakat disaran membudayakan tabiat menabung dan menyimpan wang untuk objektif lebih strategik.

(Foto hiasan)



pendidikan anak dan masa hadapan.

Sebabnya, pendidikan adalah pelaburan jangka panjang strategik berupaya memacu mobiliti sosial generasi akan datang daripada sibuk mengejar kepuasan material bersifat susut nilai.

- Ketiga, masyarakat disaran merancang setiap aktiviti harian dan kerjaya dengan lebih baik supaya sumber yang ada cukup untuk meneruskan kelangsungan hidup.

Contohnya, menjadualkan semula aktiviti hiburan keluarga di luar, penggunaan sumber sedia ada seperti elektrik, air dan petrol perlu dilakukan secara cekap dan berkesan.

Tingkat gaya hidup sihat

Sementara itu, masyarakat turut disaran untuk terus meningkatkan gaya hidup sihat. Tahap kesihatan baik mampu meningkatkan produktiviti kerja, mengurangkan tekanan, meningkatkan kesejahteraan keluarga dan mengurangkan kos perubatan.

Selain itu, masyarakat patut memanfaatkan kelebihan kecerdasan buatan (AI) dan teknologi maklumat (IT) dalam pekerjaan supaya dapat menjimatkan masa, lebih produktif dan berdaya tahan.

Dalam konteks ini, bagi pekerja terbabit dengan inisiatif bekerja dari rumah (BDR), masa dijamin boleh dialihkan untuk aktiviti produktif lain, seperti memperkasakan pertanian bandar bagi menjamin keterjaminan makanan isi rumah.

Walau apa pun pilihan dibuat, masyarakat disaran membuat pertimbangan sama ada ia 'keperluan' ataupun 'kehendak'. Ibarat 'ukur baju di badan sendiri'.